

En regurdientscha da

GR 2-3-84

## Benedetg Riedi, Sedrun

(G.F.) La mort schanegia negin humen. Gia baul egl onn niev ha ella fatg sia tura en nossa val e pretendiu sias unfrendas. Ils 8 da schaner retorna – tenor nies manegiar memia baul – Benedetg Riedi-Curschellas cun 65 onns sia olma al suprem scaffider. El era preparaus. Suenter ina greva operaziun ha el stuiu seremetter en resignazion alla via dalla crusch. Nuslein repassar il decuors da quella veta.

Benedetg Riedi ei naschius a Rueras ils 11 d'uost 1918 sco 4. affon dad 8 fargliuns. Ses geniturs ein stai: Gion Giusep e Culastia Riedi, naschida Muggli. Els ein selegrai da sia vegnida. Il trapassau ha passentau ina biala affonza. Lavor muncava buc el mudest menaschi puril dils geniturs. En quei ambient eis el vegnius instruius alla lavor ch'ei gie schi buna e sanadeivla pil carstgaun.

Arrivai ils onns da scola, ha il svegliau ed intelligent buob frequentau quellas a Rueras, il davos la scola reala a Camischolas amiez la Val. Quellas ha el terminau senza difficultads. Lu serenda el a Zug per emprender tudestg. El lavura lu pli tard tier di-versas fatscentas. Aschia era en gallarias e tier la branscha da construziun. Muort sia lavor cunscienziusa fuva el stimaus da tut. E cunquei ch'el fageva sias stuccas e veva bien humor luvravan ins bugen e tgunsch entuorn el. Tier la firma Murer eis el staus engaschaus buca meins che 30 onns. Malgrad ch'el ha buca giu caschun d'emprender il mistregn da miradur, dominava el quel dètg pulit. 1961 eis el sospaus cun Ludivina (oz



numnada Vina). Da quella lètg harmonica ein 4 affons sorti: dus buobs e duas buobas. Els sentan la sperdita dil bien bab. Quei um luvrus e spargnus ha saviu acquistar – entras cumpra – ina biala casa nova a Sedrun e dar a sia carezada famiglia agen tetg. Da quei raquintava el cun grond plascher.

Malsaus ei il Benedetg maina staus. Perquei eis ei stau aschi grev per el da stuer far enconuschiantscha cun ina malsogna maligna che ha tuccau quei um spir lavor avon 4 onns. El ei seremess. Ils 10 da schaner eis el vegnius surdaus alla tiara benedida. El ha finiu sia cuorsa, retschiert la paga celestiala per tut barhar sin quest mund. El rauassi en pasch! Alla famiglia en malencurada vegli il Segner dar la forza da purtar quella dolur.